

I. DEPUTACIÓN PROVINCIAL DE OURENSE

DEPUTACIÓN PROVINCIAL DE OURENSE

ACORDO DO PLENO POLO QUE SE APROBA O CONVENIO MARCO DE COOPERACIÓN ENTRE A DEPUTACIÓN PROVINCIAL DE OURENSE E OS CONCELLOS DA PROVINCIA PARA QUE A DEPUTACIÓN PROVINCIAL PRESTE, EN RÉXIME DE COMPETENCIA DELEGADA E CON CARÁCTER INTERMUNICIPAL, O SERVIZO DE RECOLLIDA, TRANSPORTE E TRATAMENTO DE RESIDUOS DE COMPETENCIA LOCAL NOS MUNICIPIOS QUE SE ADHIRAN

Exp. 2024/6140E

O Pleno da Deputación Provincial de Ourense, na sesión do 28 de xuño de 2024, aprobou o seguinte:

Convenio marco de cooperación entre a Deputación Provincial de Ourense e os concellos da provincia para que a Deputación Provincial preste, en réxime de competencia delegada e con carácter intermunicipal, o servizo de recollida, transporte e tratamento de residuos de competencia local nos municipios que se adhiran

Primeira. Obxecto

Constitúe o obxecto do presente convenio regular as condicións para que a Deputación Provincial de Ourense preste, en réxime de competencia delegada e con carácter intermunicipal, o servizo de recollida, transporte e tratamento de residuos de competencia local nos municipios da provincia, establecendo o réxime xurídico e económico desta fórmula de cooperación.

Na súa virtude, a Deputación Provincial asumirá o exercicio da totalidade das competencias municipais de ordenación e xestión do servizo nos municipios que se adhiran ao Convenio marco, e esta adhesión implicará a delegación do exercicio das ditas competencias nos termos detallados na cláusula 2.^a.

Segunda. Delegación de competencias relativas ao servizo de recollida, transporte e tratamento de residuos de competencia local. Ámbito funcional, material, territorial e temporal

1. En virtude da adhesión ao presente convenio, os concellos delegan na Deputación Provincial o exercicio da totalidade das competencias municipais de ordenación, xestión e prestación do servizo de recollida de residuos de competencia local, incluídas as competencias sancionadoras en materia de residuos que, conforme coa lexislación vixente, lles correspondan aos concellos.

Os concellos adheridos ao Convenio marco de cooperación entre a Deputación Provincial de Ourense e os concellos da provincia para a prestación, por parte da Deputación Provincial, en réxime de competencia delegada e con carácter intermunicipal, do servizo de recollida de residuos sólidos urbanos nos municipios que se adhiran (BOP núm. 3, do 4 de xaneiro de 2013, en adiante Convenio marco de delegación) e que tivesen delegado as competencias para establecer, impoñer e ordenar as taxas ou prezos públicos para prestar o servizo, quedan automaticamente adheridos ao presente convenio sen necesidade de realizar ningún trámite, agás que manifesten o contrario (recóllese a relación no anexo I).



A forma de adherirse a este convenio por parte dos concellos adheridos ao Convenio marco de delegación e que non tivesen delegado as competencias para establecer, impor e ordenar as taxas ou prezos públicos para prestar o servizo, será a establecida na cláusula décima.

2. En todo caso, a delegación das competencias de ordenación, xestión e prestación do servizo de recollida, transporte e tratamento de residuos de competencia local comprenderá o exercicio das seguintes funcións:

a) Ordenar o servizo, que inclúe o establecemento ou modificación das súas condicións de prestación e a elaboración e aprobación da correspondente ordenanza reguladora.

b) Establecer, impor e ordenar as taxas provinciais pola súa prestación, de conformidade co establecido na lexislación reguladora das facendas locais e no artigo 26.2 da Lei 7/1985, do 2 de abril, reguladora das bases de réxime local.

c) Elixir a forma de xestión do servizo, de entre as recollidas na lexislación de réxime local.

d) Planificar o servizo, establecendo, para tal efecto, as rutas e calendarios de recollida, a localización de colectores e as condicións da súa prestación que non requiran a aprobación dunha ordenanza, así como a planificar e programar os investimentos que procedan para a súa ampliación, desenvolvemento ou mellora.

e) Exercer a potestade sancionadora, que incluírá a inspección e comprobación de que se cumpre a normativa vixente en materia de residuos de competencia local, así como emitir ordes de execución, cando legalmente proceda.

f) Asumir, fronte a terceiros, os dereitos e obrigas que lle corresponderían ao concello adherido en tanto que titular do servizo nas relacións xurídicas derivadas da prestación do servizo.

Para estes efectos, a Deputación Provincial terá a condición de posuidor dos residuos recollidos nos termos recollidos na vixente lexislación de residuos, e subscribirá os oportunos contratos de servizo coa empresa autorizada para realizar a recepción e tratamento dos residuos da fracción resto, así como os convenios que procedan coa Comunidade Autónoma de Galicia, cos sistemas colectivos de responsabilidade ampliada do produtor (SCRAP's) e as empresas de reciclaxe coas que sexa procedente entregar os residuos obxecto da recollida selectiva.

g) Dirixir ao persoal adscrito ao servizo, fronte ao que asumirá a condición xurídica de empregador, nos termos da lexislación laboral vixente, nos supostos en que o servizo delegado se xestione de modo directo pola propia Deputación Provincial.

h) Organizar os traballos de recollida, realizar campañas de información entre a poboación, resolver as reclamacións e, en xeral, adoptar cantos actos e disposicións cumpran para garantir a prestación normal, regular e continuada do servizo.

i) Contratar a xestión indirecta do servizo, se é o caso.

k) Contratar as prestacións accesorias ao servizo, así como contratar as obras, subministracións ou servizos necesarios para a súa xestión.



l) Resolver os recursos administrativos interpostos contra os actos ditados en exercicio das competencias delegadas, e exercer cantas accións administrativas ou xudiciais procedan en relación co servizo delegado.

3. Para os efectos deste convenio, enténdese que o servizo de recollida de residuos de competencia municipal comprende recoller, transportar e entregar a un xestor autorizado – de conformidade co establecido no Plan de Xestión de Residuos Municipais de Galicia - a totalidade dos residuos que de acordo coa lexislación vixente teñen a consideración de residuos municipais e sexan de competencia local. Nesta definición, enténdense comprendidas a recollida selectiva de papel – cartón, vidro e envases lixeiros, biorresiduos, téxtiles, así como calquera outro servizo de recollida de residuos que, durante a vixencia do presente convenio, poida atribuírselle pola lexislación vixente á competencia municipal. Considérase incluída, igualmente, no ámbito da delegación a construción, ordenación e xestión de puntos limpos, áreas ou illas de acopio e composteiros comunitarios.

4. As competencias delegadas exerceranse no territorio dos concellos delegantes ata a extinción do Convenio para cada concello adherido.

Terceira. Mecanismos de control do exercicio da delegación para prestar o servizo de recollida de residuos de competencia local

1. A delegación do exercicio das competencias relativas ao servizo de recollida de residuos de competencia local non suporá a cesión da titularidade da competencia, que en todo momento seguirá a ser municipal, e delegarase unicamente o seu exercicio. Para tal efecto, establécense os mecanismos de control recollidos na presente cláusula, co obxectivo de garantir unha axeitada participación dos concellos adheridos na toma das decisións fundamentais relativas ao servizo, así como un adecuado control e seguimento do uso da delegación por parte da Deputación Provincial, sen prexuízo de procurar a maior axilidade e eficacia no desenvolvemento da xestión delegada.

2. O exercicio por parte da Deputación da competencia delegada para elixir a forma de xestión do servizo, de entre as recollidas na lexislación de réxime local, no seu caso, para aprobar os pregos de cláusulas económico – administrativas e de prescricións técnicas que rexerán a contratación da súa xestión indirecta, requirirá o informe favorable previo da Comisión Xeral de Seguimento (e, no seu caso, das comisións territoriais), adoptado co voto favorable da maioría absoluta dos concellos representados.

3. O exercicio das competencias delegadas por parte da Deputación Provincial requirirá o informe previo favorable da Comisión Xeral de Seguimento (e, no seu caso, das comisións territoriais), adoptado co voto favorable da maioría simple nos seguintes supostos:

a) Aprobar a Ordenanza reguladora do servizo ou das súas modificacións.

b) Planificar e programar os investimentos que procedan para ampliar, desenvolver ou mellorar o servizo, cando a súa contía exceda do 20% do custo económico anual do servizo reflectido no último informe anual, ou cando, sen acadar esta porcentaxe, o seu financiamento deba realizarse mediante un incremento das prestacións patrimoniais públicas do servizo ou mediante achegas dos concellos titulares del servizo.



c) Establecer as condicións para adxudicar os contratos por un importe de máis de 120.000,00 €, ou para subscribir convenios de colaboración relacionados coa prestación do servizo.

d) Formalizar convenios con outras administracións públicas.

e) Subscribir acordos, pactos ou convenios cos traballadores adscritos ao servizo e transferidos dende os concellos á Deputación Provincial ao abeiro do presente convenio.

4. O exercicio das competencias delegadas no resto de supostos poderá realizarse directamente polos órganos competentes da Deputación Provincial, sen prexuízo da dación de conta dos ditos actos á Comisión Xeral de Seguimento, cunha periodicidade mínima anual.

5. A Comisión Xeral de Seguimento poderá establecer directrices para o mellor funcionamento do servizo, que serán de obrigado cumprimento para a Deputación Provincial.

6. Os concellos adheridos poderán obter ou solicitarlle, en calquera momento, información á Deputación Provincial sobre o exercicio das competencias delegadas, mediante un escrito dirixido á Presidencia. A información deberá remitirse no prazo máximo de dez días hábiles dende que a solicitude tivese entrada no rexistro de entrada de documentos da Deputación Provincial. Sen prexuízo deste dereito, a Deputación Provincial manterá informada, de xeito periódico, a Comisión Xeral de Seguimento sobre a marcha do servizo.

Cuarta. Traspaso de medios persoais e materiais adscritos ao servizo

1. O persoal laboral municipal transferido á Deputación Provincial polos concellos en virtude de convenios de cooperación anteriores que tivesen por obxecto a xestión delegada do servizo de recollida de residuos de competencia municipal continuará dependendo da Deputación Provincial durante a vixencia do Convenio, nas condicións establecidas no artigo 44 do Estatuto dos Traballadores, sen prexuízo da posibilidade da subrogación na súa posición xurídica de empregador por parte da entidade que no futuro poida xestionar directa ou indirectamente o servizo.

2. Os concellos que deleguen na Deputación Provincial o exercicio das competencias de ordenación e xestión do servizo de recollida, transporte e tratamento de residuos de competencia local por primeira vez mediante a súa adhesión a este Convenio marco, transferirán o seu persoal laboral que estivese adscrito de xeito exclusivo ao servizo municipal de recollida de residuos e xestión de puntos limpos, á Deputación Provincial, en virtude de sucesión de empresa e nas condicións establecidas no artigo 44 do Estatuto dos Traballadores.

3. En caso de revogación da delegación ou extinción por calquera causa da vixencia do Convenio, o persoal transferido á Deputación Provincial reverterá á súa administración de orixe, entendéndose por tal o concello de procedencia. Os concellos contraen expresamente, para estes efectos, a obriga de asumir ao dito persoal nos supostos sinalados, recoñecéndoselle ademais ao dito persoal o dereito a conservar as condicións e dereitos laborais adquiridos, se é o caso, en virtude de negociación coa Deputación Provincial ou entidade que a suceda conforme co establecido no apartado seguinte. Esta regra será de aplicación incluso no suposto no que a relación xurídica laboral do persoal transferido fora obxecto de subrogación por parte dunha entidade pública ou privada en virtude de xestión directa por entidade diferente á Deputación ou xestión indirecta do servizo.



A mesma regra será de aplicación nos supostos en que o cadro de persoal adscrito ao servizo no momento da extinción do Convenio marco se modifícase con respecto ao existente no momento da adhesión, tanto no relativo á identidade persoal como ao número de traballadores transferidos. Nestes supostos, o persoal que será obxecto de sucesión por parte dos concellos determinárase en proporción á achega económica ao servizo delegado que lle correspondese ao concello afectado e tendo en conta o criterio da maior proximidade xeográfica ao dito concello do centro de traballo do traballador ou traballadores.

4. Ao abeiro do establecido no artigo 44.4 do Estatuto dos Traballadores, e en tanto non se produza a extinción dos convenios colectivos de orixe aplicables ao persoal transferido, a Deputación Provincial ou entidade que a suceda poderá negociar e subscribir acordos cos traballadores transferidos ou os seus representantes, que teñan por obxecto os dereitos e obrigas integrantes da relación laboral. Será preceptivo, para a aprobación destes acordos, o informe previo da Comisión Xeral de Seguimento do Convenio de cooperación.

Unha vez aprobados, estes acordos serán de aplicación aos traballadores afectados, que conservarán as condicións adquiridas na súa virtude incluso en caso de reversión ao concello de orixe, ata a extinción da vixencia dos ditos acordos ou convenios.

Sen prexuízo do anterior, tanto os convenios colectivos de orixe como, no seu caso, os acordos acadados baixo a súa vixencia coa Deputación Provincial, manteranse ata a súa data de expiración ou ata a entrada en vigor dun novo convenio colectivo que resulte de aplicación a estes traballadores.

5. Quedarán adscritos ao servizo intermunicipal delegado xestionado pola Deputación Provincial, todos os medios materiais que ata a data estaban adheridos ás distintas unidades de xestión creadas en virtude de convenios anteriores relativos á xestión delegada do servizo de recollida de residuos sólidos urbanos. Igualmente, quedarán adscritos a este servizo intermunicipal, os medios materiais de titularidade municipal que ata ese momento estivesen destinados de forma exclusiva ao servizo de recollida de residuos de competencia municipal no termo municipal dos concellos que deleguen na Deputación a ordenación e xestión do servizo por vez primeira mediante a súa adhesión a este convenio marco.

A Deputación Provincial poderá realizar o cambio de adscrición dos ditos medios materiais e/ou á súa substitución por outros de nova adquisición ou procedentes doutros servizos provinciais, así como á súa baixa no inventario no momento no que a súa deterioración os volva inservibles para o servizo, sen que en ningún caso o cambio de adscrición poida supoñer unha diminución da calidade do servizo prestado en cada concello.

Quinta. Réxime económico do servizo delegado

O réxime económico do servizo regularase mediante a correspondente ordenanza fiscal ou de prestacións patrimoniais de carácter público non tributario, no seu caso, que cumpra o establecido no artigo 11 da Lei 7/2022, do 8 de abril, de residuos e solos contaminados para unha economía circular. No suposto de financiar o servizo por taxas, estas terán o carácter de provinciais.



Sexta. Comisión de Seguimento

1. As funcións de seguimento, control, informe e interpretación do presente convenio corresponderán a un sistema de comisións paritarias, integrado por unha Comisión Xeral de Seguimento e unha comisión de seguimento para cada unidade territorial das definidas no anexo III.

A comisión de seguimento de cada unidade territorial estará integrada polos seguintes membros:

a) En representación da Deputación Provincial:

- A presidencia ou o/a deputado/a en quen delegue. Corresponderanlle, ademais, as funcións de presidencia da comisión.

- O/a secretario/a xeral, o/a interventor/a, o/a tesoureiro/a, o/a director/a da Área de Medio Ambiente, o/a xefe/a do Servizo de Augas e Medio Ambiente, o/a xefe/a do Servizo de RRHH, ou os/as funcionarios/as que legalmente os/as substitúan, en todos os casos con voz pero sen voto.

b) En representación de cada concello:

- O/a alcalde/esa ou o/a concelleiro/a en quen delegue, que poderá participar coa asistencia de persoal técnico que considere conveniente; este persoal contará con voz pero sen voto.

A Comisión Xeral de Seguimento estará integrada polos representantes da Deputación Provincial sinalados no anterior apartado a) e ademais un representante de cada grupo político existente na Deputación, con voz pero sen voto, e por un representante de cada unha das unidades territoriais, elixido por maioría absoluta en primeira votación e maioría simple en segunda votación no seo da comisión de seguimento de cada unidade.

Para estes efectos, para a elección do representante de cada comisión de seguimento na Comisión Xeral só se terán en conta os votos dos representantes municipais, e a Deputación carecerá de voto para adoptar os ditos acordos de elección.

Os representantes das comisións de seguimento na Comisión Xeral perderán a súa condición cando perdan a de membros da comisión pola que foron elixidos, por renuncia ou cando sexan destituídos por acordo expreso da dita comisión, adoptado por maioría absoluta. Neste último suposto, a comisión deberá elixir un novo representante na mesma sesión na que se acorde a destitución.

2. As funcións de secretaría das comisións de seguimento e da Comisión Xeral corresponderanlle a un/a funcionario/a da Área de Asesoría Xurídica e Asistencia a Municipios.

3. As comisións de seguimento de cada unidade terán carácter paritario, e corresponderalle un voto a cada concello e, á Deputación Provincial, un número de votos equivalente á suma do número dos votos municipais.

A Comisión Xeral terá igualmente carácter paritario, e corresponderalle a cada concello un número de votos equivalente ao número de concellos integrantes da unidade territorial á que representa e, á Deputación Provincial, un número de votos equivalente á suma do número dos votos municipais.

Os representantes municipais na Comisión Xeral poderán emitir os distintos votos de que dispoñan en sentido diferente, sempre que fagan constar en cada caso o sentido diferenciado do voto de cada concello integrado na unidade territorial á que representan.



4. Son funcións das comisións as seguintes:

- a) Ser informada, polo menos anualmente, do estado de execución do Convenio, así como das incidencias advertidas en cada exercicio.
- b) Coñecer as propostas, queixas ou suxestións que as partes poidan formularlles ao resto de entidades asinantes.
- c) Emitir os informes recollidos na cláusula terceira do Convenio.
- d) Informar de calquera modificación ou novación do presente convenio.
- e) Informar os supostos de resolución do Convenio.
- f) Informar as solicitudes de adhesión ao Convenio.

O exercicio destas funcións corresponderalle de xeito ordinario e permanente á Comisión Xeral de Seguimento. Non obstante o anterior, o/a secretario/a da Comisión Xeral comunicarlle aos alcaldes/esas de todos os concellos adheridos o contido dos acordos adoptados en cada sesión. Os/as alcaldes/esas disporán dun prazo de dez días naturais, que contarán a partir da recepción da notificación, para solicitar da Presidencia a convocatoria da comisión de seguimento da unidade territorial da que formen parte, co fin de tratar novamente o asunto ou asuntos que consideren convenientes. Os acordos da Comisión Xeral non terán efectos ata que transcorra o indicado prazo de dez días ou ata que se adopte o acordo que proceda na comisión de seguimento da unidade territorial, que, se é o caso, prevalecerá para os concellos integrantes da unidade respecto do acordado pola Comisión Xeral.

Sen prexuízo do anterior, e, excepcionalmente, cando existan graves razóns de interese público que o fagan necesario, a Comisión Xeral poderá declarar a inmediata executividade dos seus acordos, que se manterá ata que non adopte un acordo diferente a comisión de seguimento dunha unidade territorial.

A Comisión Xeral será competente para modificar as unidades territoriais establecidas no anexo III do presente convenio. Non obstante, os acordos que adopte a Comisión Xeral nesta materia quedan sometidos ao réxime de suspensión e revisión polas comisións de seguimento das unidades territoriais recollidos nesta cláusula para o resto dos seus acordos, coa particularidade de que as comisións de seguimento das unidades territoriais unicamente poderán rexeitar e deixar sen efecto o acordo da Comisión Xeral, pero non modificalo nin substituílo por outro diferente.

Será competencia exclusiva da comisión de cada unidade territorial a elección e destitución dos seus representantes na Comisión Xeral.

5. As comisións de seguimento adoptarán os seus acordos por maioría simple, agás naqueles casos nos que o presente convenio estableza un quórum diferente.

6. No non recollido no presente convenio, o funcionamento das comisións de seguimento rexeráse polas normas de funcionamento de órganos colexiados establecidas no título II da Lei de réxime xurídico das administracións públicas e do procedemento administrativo común.

Sétima. Réxime xurídico

O presente convenio terá natureza administrativa. A súa revisión en vía xudicial, así como a dos actos e acordos ditados na súa execución ou derivados deste, corresponderalles aos órganos da xurisdición contencioso-administrativa.



Oitava. Causas de resolución do Convenio

1. Serán causas de resolución do Convenio as seguintes:

a) Por mutuo acordo entre as partes.

b) Por baixa voluntaria de calquera dos concellos adheridos, formulada cunha antelación mínima de tres meses ao remate de cada ano natural. En todo caso, a efectividade da resolución de baixa entenderase referida sempre ao 1 de xaneiro do exercicio seguinte.

c) Por incumprir as obrigas convencionais esenciais. Para aplicar esta causa de resolución, a entidade interesada en resolver o Convenio comunicarlle previamente á presidencia da Comisión Xeral a existencia da dita causa de resolución, e a súa intención de resolvelo. Unha vez realizada esta comunicación á presidencia da comisión, esta convocará a comisión, que deberá reunirse nun prazo máximo de quince días hábiles, co fin de emitir un informe sobre a procedencia da resolución. Unha vez emitido o informe da comisión, a entidade interesada adoptará a resolución que proceda.

d) Por non delegar na Deputación Provincial de Ourense a competencia municipal para establecer, impor e ordenar as taxas ou prezos públicos por prestar o servizo.

2. Unha vez resolto ou extinguido o Convenio, este entrará en liquidación, que formulará a Deputación Provincial, previa audiencia do concello afectado, e na que se incluírán os danos e perdas ocasionados polo incumprimento de obrigas convencionais, de ser o caso. O pago das obrigas derivadas da dita reclamación poderá reclamárselle á entidade que se considere responsable, e contra o rexeitamento expreso ou tácito desta poderán interpoñerse os recursos e exercerse as accións que recolle o ordenamento vixente.

Novena. Duración do Convenio

O presente convenio, que regula os elementos fundamentais da delegación de competencias entre administracións locais, terá vixencia indefinida.

Décima. Procedemento de adhesión ao Convenio

Os concellos da provincia de Ourense poderán adherirse ao presente convenio marco mediante o acordo do pleno respectivo no que se aprobe a dita adhesión, coa aceptación expresa da totalidade das súas cláusulas.

No suposto de concellos que xa estivesen adheridos ao anterior convenio marco de delegación e non tivesen delegado as súas competencias para establecer, impor e ordenar as taxas ou prezos públicos por prestar o servizo poderán adherirse ao presente convenio marco mediante o acordo do pleno respectivo no que se manifeste a súa vontade de delegar a dita competencia en materia fiscal.

A eficacia do acordo de adhesión rexeráse polas seguintes regras:

a) No suposto de concellos que xa estivesen adheridos ao anterior convenio marco de delegación e non tivesen delegado as súas competencias para establecer, impor e ordenar as taxas ou



prezos públicos por prestar o servizo deberán comunicarlle a súa decisión á Deputación Provincial de Ourense no prazo de 2 meses dende a publicación no BOP.

Pasado este tempo sen comunicar o acordo plenario, o Convenio marco de delegación entrará en fase de resolución.

A eficacia desta delegación será o día 1 de xaneiro de 2025.

b) No suposto de concellos que deleguen por vez primeira na Deputación o exercicio das competencias de ordenación e xestión do servizo de recollida de residuos de competencia local, a comunicación de adhesión terá plenos efectos a partir do 1 de xaneiro do ano seguinte.

Non obstante o anterior, e no suposto en que non fose posible realizar os trámites precisos para o traspaso á Deputación dos medios humanos e materiais correspondentes ou non se puidese organizar axeitadamente o servizo delegado para a súa efectiva prestación a partir desa data, a Presidencia poderá adiar a data de eficacia da adhesión, na medida en que sexa necesario.

A eficacia da adhesión requirirá o informe favorable previo da Comisión Xeral. Nestes casos, a Comisión Xeral poderá establecer unha cota extraordinaria de adhesión para os novos concellos adheridos, en concepto de compensación pola amortización técnica dos medios materiais do servizo adquiridos durante a vixencia do Convenio e con anterioridade á adhesión dos novos concellos.

Décimo primeira. Unidades territoriais para a elección da Comisión Xeral de Seguimento

1. As unidades territoriais se corresponden coas comarcas da provincia de Ourense aprobadas polo Decreto 65/1997, do 20 de febreiro, polo que se aproba definitivamente o mapa comarcal de Galicia. Soamente se constituirán unidades territoriais cando se adhiran ao Convenio dous ou máis concellos de cada comarca.

No anexo III, recóllense as unidades territoriais e os seus integrantes na data de publicación deste convenio.

2. No suposto de concellos que deleguen por vez primeira na Deputación o exercicio das competencias de ordenación e xestión do servizo de recollida de residuos de competencia local, a Deputación Provincial establecerá a unidade territorial na que lle corresponderá integrarse, dispoñendo a súa integración na unidade correspondente á comarca da que forme parte ou, no seu defecto, na unidade comarcal máis próxima xeograficamente.

3. Os representantes das unidades territoriais na Comisión Xeral son os recollidos no anexo IV.

4. A Comisión Xeral poderá, en calquera momento, modificar as unidades territoriais establecidas na presente cláusula.





ANEXO I. CONCELLOS ADHERIDOS DE FORMA AUTOMÁTICA AO CONVENIO

Os concellos que están adheridos ao presente convenio, agás manifestación en contrario, son:

Amoeiro	Irixo, O	Riós	
Avión	Larouco	Rúa, A	
Baltar	Lobeira	Rubiá	
Bande	Lobios	San Amaro	
Beariz	Manzaneda	San Cibrao das Viñas	
Blancos, Os	Muíños	San Cristovo de Cea	
Boborás	Pereiro de Aguiar, O	San Xoán de Río	
Bola, A	Peroxa, A	Sandiás	
Bolo, O	Petín	Sarreaus	
Calvos de Randín	Pobra de Trives, A	Taboadela	
Castrelo de Miño	Porqueira	Trasmiras	
Entrimo	Punxín	Vilamarín	
Gudiña, A	Rairiz de Veiga	Vilamartín de Valdeorras	

ANEXO II. CONCELLOS ADHERIDOS AO CONVENIO SE ACHEGAN O ACORDO PLENARIO DE DELEGACIÓN DAS COMPETENCIAS FISCAIS NESTA MATERIA

Os concellos que deberán presentar un acordo plenario de delegación das súas competencias na Deputación Provincial de Ourense para establecer, impor e ordenar as taxas ou prezos públicos para recoller, transportar e tratar os residuos de competencia local e poder seguir adheridos ao Convenio son:

- Carballada de Valdeorras
- Carballiño, O
- Castro Caldelas
- Chandrexa de Queixa
- Coles
- Maceda
- Montederramo
- Padrenda
- Ribadavia
- Teixeira, A
- Toén
- Veiga, A
- Viana do Bolo
- Vilar de Barrio
- Vilariño de Conso
- Xinzo de Limia



ANEXO III. UNIDADES TERRITORIAIS

As unidades territoriais serán as seguintes:

- Unidade Territorial da Limia, integrada polos concellos de Baltar, Calvos de Randín, Os Blancos, Porqueira, Sandiás, Sarreaus, Trasmiras, Xinzo de Limia, Rairiz de Veiga e Vilar de Barrio.
- Unidade Territorial da Baixa Limia, integrada polos concellos de Entrimo, Bande, Lobeira, Lobios e Muíños.
- Unidade Territorial Terra de Caldelas, integrada polos concellos de Montederramo, A Teixeira, Castro Caldelas e Maceda.
- Unidade Territorial Terra de Trives, integrada polos concellos da Pobra de Trives, Manzaneda, San Xoán de Río e Chandrexa de Queixa.
- Unidade Territorial de Valdeorras, integrada polos concellos de Larouco, Petín, A Rúa, Vilamartín de Valdeorras, Carballeda de Valdeorras, Rubiá e A Veiga.
- Unidade Territorial de Ourense, integrada polos concellos do Pereiro de Aguiar, A Peroxa, Amoeiro, Coles, Vilamarín, Toén, Taboadela e San Cibrao das Viñas.
- Unidade Territorial do Ribeiro, integrada polos concellos de Ribadavia, Castrelo de Miño e Avión.
- Unidade Territorial do Carballiño, integrada polos concellos de Beariz, Boborás, O Carballiño, O Irixo, Punxín, San Amaro e San Cristovo de Cea.
- Unidade Territorial de Celanova, integrada polos concellos de A Bola e Padrenda.
- Unidade Territorial de Viana do Bolo integrada polos concellos da Gudiña, Viana do Bolo, O Bolo, Vilariño de Conso e Riós.





ANEXO IV. REPRESENTANTES DAS UNIDADES TERRITORIAIS

Os representantes e suplentes na Comisión das unidades territoriais na data de publicación deste convenio son:

UNIDADES TERRITORIAIS	REPRESENTANTE	SUPLENTE
A Limia	Trasmiras	Sarreaus
A Baixa Limia	Lobios	
Terra de Caldelas	A Teixeira	
Terra de Trives	A Pobra de Trives	Manzaneda
Valdeorras	Carballeda de Valdeorras	A Veiga
Ourense	Vilamarín	Coles
Allariz-Maceda	Maceda	
O Ribeiro	Ribadavia	Avión
O Carballiño	San Amaro	S. Cristovo de Cea
Celanova	A Bola	Padrenda
Viana do Bolo	A Gudiña	Viana do Bolo

Ourense, 1 de xullo de 2024. O deputado delegado da Área de Medio Ambiente e Enerxía. (P.D.: Resol.: 2023/9863, 2023/11613).

Asdo.: José María Lago Cabo.

R. 1.785

